



皇明憲章類編卷之十六

吏部

洪武元年十月以汪河為吏部侍郎河初為大都督府都事癸卯歲奉使擴廓帖木兒被拘陝右六年至是始還故有是擢

洪武四年五月以李守道詹同為吏部尚書

洪武十一年三月上謂吏部臣曰朝廷懸爵祿以待天下之士資格者為常流設耳若有賢才豈拘常例今

後庶官之有才能而居下位者當不次用之

尚書
洪武十三年正月召山西布政司左叅政契斯為吏部

尚書
洪武二十九年正月 以杜澤為吏部尚書

洪武三十一年三月 上諭吏部臣曰用人之道在於
隨材任使則天下無棄人矣又曰觀人之法有數等才
德俱優者上也才不及德者其次也才有餘而德不足
又其次也苟二者俱無此不足論矣若逐勢變移好作
威福言是而行非此小人不可用也

洪武三十一年六月 議革冗員 以中書舍人蹇義
為吏部右侍郎 十二月 以雲南左布政使

張統為吏部尚書

革除建文元年十二月 以練子寧為吏部左侍郎

革除建文二年二月 令蘇松江浙人得官戶部

革除建文三年十二月 起復陳洽為文選郎中

革除建文四年八月

成祖以蹇義為吏部尚書

永樂二年四月吏部尚書蹇義奏請選官 上諭之曰

爾等職專銓選但當揆理不當任情揆理則以是非為進退任情則以從違為取舍慎之慎之又曰用人之道各隨所長才優者使治事德厚者令牧民蓋有才者未必皆君子有德者必不為小人不可不察

宣德元年四月吏部尚書 蹇義等奏請選官 上諭之曰庶官賢否關國家之治亂掌銓衡者以進賢退不肖為職一事得人則一事理一邑得人則一邑安推之庶政達之天下無二致也朕嗣承祖宗大統維新治理以安民生選賢任能尤為切要古人取士於鄉以其道

藝著聞有素後世以言貌求其底蘊蓋亦難矣况篤實之士率多恬退便辟之才巧於進取非至公無以昧私非至明不能格物嚴選舉以遏冗濫精考核以防矯偽毋俾小人貽患於民斯善矣古之大臣以賢事君國家膺福蒼生受惠聲名流芳於永世卿等勉之

宣德五年正月吏部奏選官 上因與侍臣論前代官制上曰省官安民之道唐虞建官惟百夏商官倍秦漢以下視夏商官益增多何也侍臣對曰時世不同也上曰唐虞三代事簡民淳不可比擬唐太宗定內外官七

百三十員去古未遠亦足為法侍臣對曰然必君心清則事簡事簡則官可省官省則民安矣若國家多事政務煩雜小人倖進冗食者多欲百姓免於煩擾難矣上曰此誠確論清心者省事之本朕當勉之 八月上罷朝謂吏部尚書郭璉等曰東漢初竇融保河西以孔奮為姑臧長姑臧最富饒奮獨以潔廉自守眾皆笑之謂其身處脂膏不能自潤光武知之及融率官屬入朝即擢奮為武都郡丞以旌之夫激揚清濁為治之道使清濁無別何以勸懲天下光武即位未幾舉卓茂又舉

孔奮東漢多循良吏蓋由此也今天下未嘗無潔士卿宜為朕甄別以聞朕當旌之若人有善而上不知則為善者怠矣 十二月 上謂吏部尚書郭璉等曰朕以用人之柄付卿當為朕擇才昨郡守多缺乃命廷臣共舉古之人當斯任者必勤於訪問有得即錄之故官不乏才呂蒙正之夾袋虞允文之材館錄是也自今宜留意璉等皆頓首

宣德七年八月 陞吏部考功員外郎魏驥為南京太常少卿以京官三品以上所薦云

宣德十年正月吏部尚書蹇義卒年七十三謚忠定義
歷事五朝五十餘年性之耿直遇事脂韋王紳謂其與
時浮沉李賢謂其依違承順唐之蘇模稜宋之三旨宰
相蓋其人云

正統元年正月吏部考功郎中李茂弘致仕時中官王
振用事茂弘嘗言可憂者君臣之情不通今經筵進講
不過應故事以粉飾太平而睽隔蒙蔽未必無意外之
虞由遂抗章致仕去

正統七年七月吏部尚書郭璉罷都御史王文疏其貪
墨故罷之 以禮部左侍郎王直為吏部尚書

正統十一年八月以禮部侍郎錢習禮署吏部事

正統十四年十月景泰 擢吏部侍郎何文淵為吏

部尚書文淵初由温州知府超陞刑部侍郎以病乞歸
至是廷臣乞起之乃召為吏部侍郎至京遂進尚書尋
加太子太保

景泰四年正月吏部尚書何文淵罷時科道交章劾文
淵貪縱姦邪實跡乞治其罪詔下文淵獄文淵自言易
儲有功詔書所云天祐下民作之君父有天下傳之子

已所屬對也乃令致仕人益鄙之 按李賢曰何文淵
守温州時廉靜寡欲一郡大治召為刑部侍郎有餽金
者却之好事者為立却金館在刑部雖有深刻意以尚
書主之弗克自遂人亦未知其微也後以病乞歸正統
未天下多事廷臣交章薦起之召為吏部侍郎遂進尚
書其於擢用人才之際詭譎之跡始露而臺諫公論皆
不能容雖百計固位而攻之者益衆指其姦邪暴其情
狀終於斥去其初廉於作罷者乃其干進之計也及立
身一敗雖有喬新為之子不能蓋其愆矣可不畏哉

二月 以王翱為吏部尚書時吏部尚書缺 上命舉
可稱任者練綱率諸御史上言左都御史王翱嚴公峭
直右副都御史年富操履端方大理寺卿薛瑄持正不
回此三人者擇而用之庶能品藻人才追蹤王直 十
月召總督兩廣軍務左都御史王翱還為吏部尚書時
何文淵既去朝廷以王直年老思得剛明果斷者以協
助之乃召翱翱嚴加考察公銓注抑奔競杜請托一時
任使並稱得人

天順元年正月以王翱掌吏部事 三月前吏部尚書

致仕何文淵卒先是景泰易儲之詔既下文淵嘗告人曰詔語天祐下民作之君父有天下傳之子吾所屬對也既歸鄉里又屢以告麗邑親識人皆知之及上復位鄉人固虞文淵必及禍一日訛傳陳都御史將至人皆譙疑文淵遂自縊死時同鄉侍郎揭稽謫官家居與文淵子喬新構怨奏文淵之死實諸子逼以脫禍喬新亦奏稽巡撫廣東時嘗薦黃玠及代玠草易儲之疏俱命官校逮至京鞫之迹涉已往俱釋之

天順元年四月吏部尚書王翱以年老乞致仕李賢言於上曰翱廉謹老成雖老精力未衰乃留之

天順二年四月吏部左侍郎孫弘聞喪上召李賢曰

孫弘豈勝吏部賢曰誠如聖諭蓋弘先以知縣考滿赴

京為石亨鄉里囑留京官又因奉迎有功陞工部侍郎

復極力謀求得此士林鄙之上又恐其謀奪情即令守

制復召賢曰吏部乃天下人物權衡侍郎即尚書之次

非他部比必得其人卿以為誰可賢曰無如鄒幹姚夔

上復問其優劣賢曰幹端謹但規模稍狹夔表裏相稱

有大臣之量上曰然以姚夔為吏部侍郎

天順三年九月謫吏部侍郎孫弘為大理通判

天順四年閏十一月 召巡撫南直隸右副都御史崔

恭為吏部右侍郎恭廉宗人剛廉有為嘗知萊州府值

歲旱蝗恭親督捕發郡縣倉勸富民粟賑之民賴以全

活在萊六年屢辨冤獄遷湖廣右布政使威惠大行巡

撫蘇松時有清軍御史郭觀持法過刻崑山縣有一人

涉誣連逮充軍者至二十四人欲訴冤於恭或謂巡撫

與御史各領勅行事訴之無益或謂在京刑部都察院

獄情必大理寺評允無礙方敢決斷御史在外行事刑

獄苟有冤抑伸理平反非巡撫而誰於是往訴於恭果

為平反二十四人皆復為民先是有提學歐御史校士

不公被黜者相率訴于前巡撫李秉不為理恭繼至諸

生復往訴恭一一親試之移文提學覆試仍送入學不

數年有中鄉試者有登進士者南畿巡撫自周忱之後

恭為特著云

天順六年九月少傅吏部尚書致仕王直卒年八十四

贈太保謚文端直在翰林侍從三十餘年為冢宰十六

年躋三孤登一品八十致仕

天順七年二月以尹旻為吏部右侍郎

成化元年三月 加吏部尚書王翱太子太保

成化三年七月吏部尚書王翱寢疾乞致仕從之時翱年八十有四 十一月致仕少保吏部尚書王翱卒贈太保謚忠肅翱直隸鹽山人永樂乙未進士清心寡慾方嚴質直循守禮法不尚文藝又在邊方一惟鎮靜及典銓衡門無私謁明於知人進賢唯恐不及歷任五十二年第宅服食不改於舊沒後家無餘貲人謂其清白之節雖古名臣何以加焉 以都察院左都御史李秉

為吏部尚書

成化五年正月刑科給事中蕭彥莊劾奏吏部尚書李秉任情行私其大罪十有三且言其暗結年深御史附已專權 上命三法司會多官議聞於是尚書陸瑜會六部衙門議秉銜直沽名顛倒選法詔曰秉有負任使革太子少保令致仕其所言暗結年深御史仍命彥莊指實回奏時大理寺卿王槩彥莊姻家欲謀逐秉而代之是奏槩所授也彥莊既被旨詰秉所結年深御史乃以劉璧吳遠馮徽對蓋以璧等嘗建言推舉官當悉歸

吏部遂俱下錦衣衛獄彥莊所劾退丘陵孫遇李齡亦多誣枉陵累愬辯不已乃命會官并彥莊廷鞫彥莊坐奏事不實降四川永寧驛丞至永寧未幾署大寧縣事以科罰過重為怨者所殺聞者快之丘陵蘭陽人自為知縣以至山西布政俱膺旌典孫遇福山人知徽州拯饑恤寃歷江西河南布政省儉節費李齡朝陽人為北畿江西提學諸生皆率服

成化五年五月吏部尚書崔恭以母喪去任以吏部右侍郎尹旻為本部左侍郎改禮部右侍郎葉盛為吏部右侍郎六月以禮部尚書姚夔為吏部尚書初李秉去商輅欲薦夔彭時欲薦王槩而尹旻又欲得之相持既久乃用崔恭至是乃以夔代恭

成化五年十一月吏部文選郎中陳雲員外劉恒主事乙瑄陳道為吏訐其受賂放吏刑部請逮雲等下獄科道官劾吏部尚書姚夔等私昵屬官刑部尚書陸瑜等朋比故縱并掌通政司事侍郎張文質傳雷吏所奏本二日使雲等得以為計上以雲等既下獄夔等俱置不問刑部以被劾涉嫌乞調別衙門問理改下錦衣衛

韜之既而都察院擬罪例贖杖還職 上命調雲等於
南京部屬其告訐吏孫慶等遣為民

成化九年二月吏部尚書姚夔卒夔浙江桐廬人正統
間以春秋舉鄉會試皆第一賜進士擢吏科給事中景
泰天順間歷南京刑部侍郎進禮部侍郎吏部尚書至
是卒年六十夔豪俊慷慨不拘小節論者謂其類唐杜
黃裳而未免通餽謝當時蓋已疵之 以尹旻為吏部
尚書 七月吏部尚書尹旻等言本部議奏天下諸司
官有缺每五日內申所司巡按御史兩月六次具奏各

司府每三月類上本部而諸司乃有不如期奏報者自
今乞下巡按御史并諸司令其一一如前所奏上之違
者俱論以法詔從其議

成化十年三月吏部左侍郎葉盛卒盛崑山人正統乙
丑進士授兵科給事中己巳之變朝廷多事六科建白
多盛與林聰為倡景泰壬申陞山西叅政協贊獨石等
處設法創置百廢具興教民耕種多所收穫天順改元
擢僉都御史巡撫兩廣成化初巡撫宣府墾田益廣以
所積餘糧鬻戰馬千八百匹滄屯堡七百餘所召入為

禮部侍郎卒年五十五賜謚文莊盛留心世務在宣府多所建置但在兩廣不能戢下官軍多馘平人報功又以峒蠻出沒不常禁有司不許擅申盜賊必俟年終彙奏未免姑息觀望識者非之

成化十三年六月尹旻調兵部武選司郎中姚璧為廣西思明府同知璧故尚書夔之子夔素與尹旻不協及璧又忤旻意欲注邊郡恐致物議乃擬徽州近地知內批必不從果得旨璧浙人何得處以近地遂有是命璧居廣西數年以病歸卒于家 七月陞耿裕為吏部右

侍郎

成化十五年春正月從太監汪直之請勅加吏部尚書尹旻為太子太保

成化二十二年五月革尹旻太子太保以尚書致仕以其子子龍納賄行私 八月陞吏部左侍郎耿裕為吏部尚書 十月調吏部尚書耿裕于南京禮部改工部尚書李裕禮部左侍郎徐溥于吏部溥仍兼學士

成化二十三年九月 吏部尚書李裕以附李孜

省罷 十月召前南京兵部尚書致仕王恕為吏部尚

書尋加太子太保先是司禮太監懷恩以直道黜居鳳陽至是召還預政恩素知萬安諛佞王恕剛正力言于上請去萬安而召恕用之遂有是命恕至京鄒智往語之曰三代而下人臣不獲見君所以事事苟且公宜先請見君時政之不善者歷歷陳於上前庶其有濟一受官職再無可見之時矣恕善其言而不能用時南京科道交章保薦恕宜入閣上曰朕用蹇義王直故事委恕吏部若有謀議亦無不聽

成化二十三年十月孝宗

以少詹事楊守陳為吏

部右侍郎

弘治二年三月以張悅為吏部侍郎十月吏部右侍

郎楊守陳卒謚文懿守陳浙江鄞縣人性恬淡官五品

十有六年泊然自處未嘗求進權幸有重其賢欲援之者使所親喻意守陳謝却之謂其人曰吾猶嫠婦也守節三十年今老矣豈白首而改節耶嘗被命教內豎多為近侍與守陳同事者率因之取寵貴而守陳獨無所資藉嘗言古人謂國可滅史不可滅我太祖定天下即命儒臣撰元史太宗靖內難其後史臣不紀建文君

事遂使建文五年政事及當時忠於所事者皆湮沒不傳及今採輯尚可補國史之缺景皇帝已復位號而英宗實錄標目猶書郕戾王附是宜改正草奏欲上以病不果

弘治六年三月太子太保吏部尚書王恕罷時大學士丘濬亦階太子太保兼禮部尚書一日內宴濬以內閣位恕上恕以已冢宰不宜居禮書下頗有言適太醫院判劉文泰援例求進事下吏部議格不行文泰因憾恕遂訐奏恕變亂選法及不當令人作大司馬王公傳內

多詳述留中之疏并封所刻傳進之濬謂恕賣直沽名恕上疏自劾乃下文泰獄降御醫恕求去益力詔允之命乘傳以歸有司歲給役米文泰之奏訐濬陰囑之於是言官交章劾濬媚嫉妨賢乞賜罷黜上不聽改禮部尚書耿裕為吏部尚書加太子太保

弘治六年八月以周經吳寬為吏部左右侍郎

弘治七年四月改南吏部考功郎中儲瓘為吏部考功郎中瓘留意人才考注臧否無不曲當

弘治八年二月吏部尚書耿裕卒謚文恪裕遵其父九

疇之教世守清脩不營產業不治居第儉約蕭然無異
寒素表儀縉紳世濟其美

弘治九年二月 以屠瀟為吏部尚書

弘治十三年五月屠瀟乞致仕許之加太子太傅

六月 召南京兵部尚書倪岳為吏部尚書

七月以王鏊為吏部右侍郎

弘治十四年十月 太子少保吏部尚書倪岳卒謚文

毅岳在禮部十餘年儀文制度多所擬定在吏部獎恬

抑躁不恤恩怨正色盛氣人不敢干以私事當廷議片

言裁決天下皆仰其風采以為謙之爭子云

弘治十四年十月改兵部尚書馬文升為吏部尚書

正德元年夏四月 吏部尚書馬文升罷先是御用監

太監王瑞以大昏禮奏書篆儒士缺人吏部已奉旨考

選復有旨令革退人役通送本監考校優劣文升方枉

塞倖門堅執不從瑞慚憤奏文升抗拒科道皆上疏力

辨事乃寢文升素與劉大夏不協文升與許進劉宇皆

河南人在先帝時文升嘗薦進提督團營宇總制宣大

大夏見先帝因言宇之過宇幾不免戶部侍郎王儼兵

部侍郎熊繡皆湖廣人儼與大夏姻親繡以廉著文升
欲抑儼等引進劉宇會兩廣缺總督都御史文升薦繡
往補之繡不樂于外詣吏部辭之不允繡憾之與李東
陽謀去文升以大夏代其任至是乃諷同鄉御史何天
衢屢疏論之文升遂力求致仕章疏前後至二十一上
乃允 以吏部左侍郎焦芳為吏部尚書芳河南泌陽
人時司禮太監李榮亦河南人為芳內援故李東陽輩
之謀不行

十一月調提督團營兵部尚書許進為吏部尚書

十二月吏部侍郎兼學士張元禎卒元禎為江西南昌
人以進士庶吉士入翰林歷前職平生論議慷慨六名
好脩每與陳選羅倫陳獻章以理學相箴警天下之士
皆想望風采晚年以纂脩再出務為貶抑言官詆其營
求竟歿于京邸未免齎恨云

正德三年正月罷吏部尚書許進尋除名為民調兵部
尚書劉宇為吏部尚書皆劉瑾所為 以王瓊為吏部
右侍郎 四月致仕吏部尚書王恕卒年九十四贈左
柱國太師謚端毅恕陝西三原人舉進士授大理評事

寺副知揚州歷江西河南布政使巡撫荆襄河南雲南
進南兵書巡撫南畿復兵書以至冢宰隨在著稱好學
則至老不倦所著有漕河通志介菴奏議玩易意見石
渠意見經籍格言等書

正德四年四月降吏部尚書兼學士梁儲為右侍郎劉
瑛以儲等在弘治中纂脩大明會典壞宗祖制書雜以
新例悉毀之儲因降為侍郎左庶子毛澄左諭德傅珪
等皆降職大學士王鏊致仕免究惟李東陽如故
五月以孝宗實錄成復梁儲吏部尚書兼學士

十月以吏部左侍郎張綵為吏部尚書綵陝西人弘治
中任文選即中養病歸劉瑾查京官養病父者悉革為
民綵赴京焦芳薦于瑾復補舊任已而楊一清薦綵諳
曉韜畧堪任邊方巡撫陞都御史尋陞侍郎劉宇入閣
遂以綵代之綵嘗勸瑾今天下諸司官有饋送禮物者
非取于官庫則斂于小民取怨貽患不可瑾納其言遂
禁察饋遺者適巡按山東御史胡節回斂銀欲行饋送
瑾偵知之捕下獄死少監李宣侍郎張鸞錦衣指揮趙
良差徃福建回斂銀貳萬兩饋瑾瑾奏收其銀於承運

庫宣等皆降黜其餘因饋送得罪者甚多剝削之弊一時少息綵又嘗言于瑾謂其左右用事者多騙財壞法瑾悉去之其他救正頗多衣冠之禍少減然綵在吏部惟知敬瑾諸官者以為瑾之踈同類皆綵教之

正德五年八月劉瑾既誅下吏部尚書張綵獄初綵在吏部尊敬瑾故事 吏部推用大臣必關白內閣綵以為事在劉瑾內閣不得預每忽之及瑾被繫捕綵下都察院獄病死仍暴其屍家屬流嶺南

九月以傅珪為翰林學士孟可陞吏部右侍郎

十月吏部尚書許進卒贈太子太保謚襄毅

正德六年正月改兵部尚書楊一清為吏部尚書

調南京刑部主事王守仁為吏部驗封主事

十二月以蔣冕為吏部右侍郎

正德七年正月以王守仁為考功郎中 前少師吏部

尚書馬文升卒年八十五贈太傅謚端肅文升鈞州人性介特不尚華侈立朝五十餘年重名節勵廉隅雖位極人臣退然不敢自居至於值事變臨利害則屹然不可奪云

正德八年正月以南戶部左侍郎儲瓘為吏部左侍郎未幾而卒五十七瓘先世毘陵人元末徙泰州瓘少貧無資勤苦嗜學舉成化癸卯甲辰鄉會試皆第一狷介清脩與物無競推引名士振起阨窮逆瑾專權時公卿奔走瓘愧憤引疾去既而起用亦遂乞休至是再起卒謚文懿

正德元年十一月加吏部尚書楊一清少傅兼太子太傅給事中王昂以選法不公劾之詔下謫昂一清上章自劾保留昂朝廷不聽謫昂休寧縣丞期月轉應天

推官昂不避權貴一清受善納諫天下兩賢之

正德十年四月調兵部尚書陸完為吏部尚書

十二月以王鴻儒為吏部侍郎

正德十四年七月逮吏部尚書陸完下獄藉其家以交通宸濠故

正德十五年十月調兵部尚書王瓊為吏部尚書

正德十六年正月以羅欽順為吏部左侍郎

按吏部尚書領太子太保自詹徽始詹坐藍黨死其登少師自蹇義始馬文升繼之王直則少傅也吏部尚書

一人左右侍郎各一人其屬司務二人文選驗封稽勲
考功四清吏司文選郎中一人員外郎一人主事二人
驗封郎中一人員外郎一人主事一人稽勲郎中一人
員外郎一人主事一人考功郎中一人員外郎一人主
事二人吏四十五人監生六十七人

文武官品階

洪武二十五年十一月上以中外文武百官職名沿革
品秩崇卑勲階陞轉俸祿損益歷年滋久屢有不同無
以示成憲于後世乃命儒臣重定其品階勲祿之制以
示天下惟醫學陰陽僧道官俱不給祿

按太師太傅太保宗人令左右宗正左右宗人左右都
督品正一階初授特進榮祿大夫陞授特進光祿大夫
勳左柱國右柱國祿月支米八十七石太子太師太子

太專太子太保都督同知(品)從一(階)初授榮祿大夫陞授光祿大夫(勳)柱國(祿)月支米七十四石太子少師太子少傅太子少保尚書左右都御史(品)正二(階)初授資善大夫陞授資政大夫加授資德大夫(勳)正治上卿都督僉事正畱守都指揮使(品)正二(階)初授驃騎將軍陞授金吾將軍加授龍虎將軍(勳)上護軍(祿)以上文武俱月支米六十一石衍聖公真人俱(品)正二無勳祿左右布政使(品)從二(階)初授中奉大夫陞授通奉大夫加授正奉大夫(勳)正治卿都指揮同知(品)從二(階)初授鎮

將軍陞授定國將軍加授奉國將軍(勳)護軍(祿)以上文武俱月支米四十八石太子賓客侍郎副都御史通政使大理卿太常卿詹事府尹按察使(品)正三(階)初授嘉議大夫陞通議大夫加授正議大夫(勳)資治尹副畱守都指揮僉事指揮使(品)正三(階)初授昭勇將軍陞授昭毅將軍加授昭武將軍(勳)上輕車都尉(祿)以上文武俱月支米三十五石光祿卿太僕卿行太僕卿苑馬卿叅政都轉運鹽使(品)從三(階)初授亞中大夫陞授中大夫加授大中大夫(勳)資治少尹畱守指揮同知衛指揮同

知宣慰使(品)從三階(階)初授懷遠將軍陞授定遠將軍加授遠將軍(勳)輕騎都尉(祿)以上文武俱月支米二十六石宣慰使係土官無祿餘倣此僉都御史通政大理太常太僕少卿少詹事鴻臚卿京府丞按察副使行太僕少卿苑馬少卿知府(品)正四階(階)初授中順大夫陞授中憲大夫加授中議大夫(勳)替浴尹指揮僉事宣慰同知(品)正四階(階)初授明威將軍陞授宣威將軍加授廣威將軍(勳)上騎都尉(祿)以上文武俱月支米二十四石國子祭酒布政司叅議鹽運同知(品)從四階(階)初授朝列大夫

陞授朝議大夫加授朝請大夫(勳)替浴少尹(祿)月支米二十石宣慰司副使宣撫司宣撫(品)從四階(階)初授宣武將軍陞授顯武將軍加授信武將軍(勳)祿無殿大學士閣坊大學士翰林學士庶子通政司叅議大理寺丞尚寶卿光祿少卿部郎中欽天監正太醫院使京府治中宗人府經歷上林苑監正按察僉事府同知王府長史(品)正五階(階)初授奉議大夫陞授奉政大夫(勳)脩正庶尹儀衛正正千戶宣慰同知(品)正五階(階)初授武德將軍陞授武節將軍(勳)驍騎尉(祿)以上文武俱月支米十六石

侍讀學士侍講學士諭德洗馬尚寶鴻臚少卿員外郎
五府經歷知州鹽運副使鹽課提舉(品從五階)初授奉
訓大夫陞授奉直大夫(勳)協正庶尹衛鎮撫副千戶儀
衛副招討司招討宣撫司副使安撫司安撫(品從五階)
初授武畧將軍陞授武毅將軍(勳)飛騎尉(祿)以上文武
俱月支米一十四石大理寺正詹事丞中允侍讀侍講
司業太常寺丞尚寶司丞太僕寺行太僕寺丞主事太
醫院判都察院經歷京知縣府通判上林苑監副欽天
監副五官正兵馬指揮留守司都司經歷斷事典仗審

理正(品)正六階初授承直郎陞授承德郎(勳)無百戶長
官副招討宣撫僉事安撫同知(品)正六階初授昭信校
尉陞授承信校尉(勳)雲騎尉(祿)以上文武俱支月米十
石神樂觀提點僧善世正一(品)正六無勳祿贊善司直
郎脩撰光祿寺丞署正鴻臚寺丞大理寺副京府推官
布政司經歷理問鹽運判官州同知鹽課司提舉市舶
河渠副提舉(品)從六階初授儒承務郎陞授儒林郎吏
出身宣德郎(勳)無(祿)月支米八石都給事中監察御史
編修評事行人司正五府都察院都事通政司經歷太

常博士典簿兵馬副指揮營繕所正京縣丞府推官知縣按察司經歷留守司都司都事副斷事審理副安撫僉事蠻夷長官品正七階儒初授承事即陞授文林郎吏出身宣義郎勳無祿月支米七石五斗檢討左右給事中給事中中書舍人行人司副光祿典簿署丞詹事太僕主簿京府經歷靈臺郎祠祭署奉祀州判官布政司都事副理問鹽課司副提舉衛鹽運司宣慰招討司經歷蠻夷副長官品從七階初授從仕即陞授徵仕即祿月支米七石國子監丞五經博士行人部庶磨通政

司知事京縣主簿欽天監主簿保章正御醫協律郎典牧所提領營繕所副大通關寶鈔龍江司提舉衛知事府經歷縣丞鹽同提舉按察知事宣慰都事王府典寶奉祀良醫典膳正紀善講經至靈元符崇直官靈官品正八階初授迪功即陞授脩職即祿月支米六石六斗清紀郎翰林典籍國子助教典簿博士光祿錄事監事鴻臚寺主簿京府運司知事挈壺正祠祭署祀丞布政司照磨王府典膳副奉祀副典寶副良醫副宣慰經歷神樂知觀崇直官副靈官左右覺義玄義品從八階初

授迪功佐即陞授脩職佐即(祿)月支米六石校書侍書
國子學正部檢校鴻臚署丞五官監候司曆營繕所丞
典牧所會同館文思院承運寶鈔廣運廣積贓罰十字
庫顏料皮作鞍轡寶源等局織染所京府織染局各太
使龍江寶鈔副提舉府知事縣主簿長史司主簿典儀
正典樂牧監正茶馬大使贊禮即奉饗宣撫安撫司知
事(品)正九(階)初授將仕即陞授登仕即(祿)月支米五石
五斗待詔司諫通事舍人正字詹事府錄事司務學錄
典籍鳴贊序班司晨漏刻博士司牧大使牧監副圍長

太醫院提舉司鹽課司州所吏目軍儲御馬都督府門
倉軍器等局大使承運寶鈔廣運廣積贓罰十字庫副
使典牧所會同館文思院副使廣盈太倉銀太僕寺京
府庫都稅宣課柴炭司大使顏料皮作鞍轡寶源局織
染所京府織染副使草場大使孔顏孟子孫教授按察
司檢校府宣撫司照磨典儀副教授伴讀都司運司府
京衛宣撫慰司學教授司庫司府雜造織染局稅課司
大使司獄巡檢茶馬副使正術正科都綱都紀太常司
樂教坊韶舞司樂(品)從九(階)初授將佐即陞授登仕佐

卽祿月支米五石孔目掌饌學正教諭訓導兵馬斷事
長官司吏目司性司牧副使府檢校典史軍器局柴炭
司副使 遞運所大使驛丞河泊所閘壩官關大使牧
監錄事群長提控案牘都督府御馬軍儲門倉副使廣
盈庫都課都稅稅課司副使茶鹽課司司府州縣衛所
倉場大使副鹽運司府衛提舉司所州縣庫大使副使
司府州軍器織染雜造局副使茶運批驗所巾帽針工
局度遠裕民司竹副使司庫副使宣德倉司竹鐵冶河
州遼陽青州府樂安稅課司大使鹽倉稅課鈔紙印鈔
鑄印抽分竹木惠民局水銀硃砂場局生藥庫長史司
倉庫大使副使縣雜造局副使典科訓科典術訓術副
都綱都紀僧正道正僧會道會以上俱未入品階祿月
支米三石

官制

革除建文元年二月更定官制

按建文時改官制陞六部尚書正一品設左右侍中各
一人位侍郎上諸司去清吏字改戶部為民度支金帛

倉庾四司刑部為詳憲比議職門都官四司罷左右都御史設都御史一人副僉都御史各一人又改都察院為御史府設御史大夫正二品革十三道置察院一定御史二十八人改諸御史為拾遺補缺改通政司為寺通政使為通政卿通政少卿叅議寺丞增置左右補缺左右拾遺各一人復大理寺改為司又改卿為大理卿左右寺正都評事寺副副都評事司務都典簿太常寺改卿為太常卿少卿寺丞分左右天壇祠祭署為南郊祠祭署泗州祠祭署為泗濱祠祭署宿州祠祭署為新

豐祠祭署孝陵置鍾山祠祭署及司園所增神樂觀一人光祿寺改卿為光祿卿少卿寺丞如太常陞少卿從四品省署丞二人增監事二人太僕寺改卿為太僕卿增典廐典牧二署驕駃十五群遂生三群分隸二署厰事府增少卿寺丞各一人賓客二人又置資德院設資德一人資善二人其屬贊禮贊書著作即各二人掌籍典簿各一人國子監陞監丞為堂上官增司業二人省博士學正學錄增助教十七人鴻臚寺改卿為鴻臚卿少卿寺丞如光祿并行人司於鴻臚寺翰林院增學士

承旨一人學士一人設文學博士二人省侍講侍讀學士置文翰文史二館文翰館設侍書改中書舍人為侍書文史館設脩撰編脩檢討又改謹身殿為正心殿設學士一人罷華蓋文華武英三殿文淵閣東閣大學士各設學士一人待設無定員文淵閣設典籍一人六科罷左右給事中改中東西南北城兵馬指揮司為五城兵馬司指揮副指揮為兵馬副兵馬始署京衛武學教授一人啓忠等齋各訓導二人布政司革左右布政使設布政使一人堂上官各陞品一級改提刑按察司為

十三肅政按察司廣東鹽課司為廣東都轉運鹽使司罷北平山東河南山西陝西五省及江北學校貢士革五府左右斷事官五軍斷事司增親王官賓輔二人正三品伴讀伴講伴書各一人長史一人左右長史各一人審理正典膳正奉祀正良醫正典寶正竝去正字審理副等改為副審理等郡王賓友二人正四品教授一人記室二人直史一人左右直史各一人吏目一人典印典祠典禮典饌典樂五署典印典祠典禮典饌典樂各一人典儀二人引禮舍人二人儀仗司吏目一人賓

輔三伴賓友教授進對侍坐稱名不稱臣見禮如賓師
靖難後俱復洪武舊官制惟存大理寺不設斷事官及
斷事司正統中復設京衛武學

久任大臣

按永樂至正統間諸老臣在政地既久且專寒義為吏
部尚書夏原吉為戶部尚書皆二十七年黃福尚書兩
京三十九年而在交南者十有九年胡濙為禮部尚書
三十二年周忱巡撫江南二十二年以故用人理財禮

樂征伐諸大政文經武緯合盡其長章程故在後鮮能
及

國朝類編卷之十六終

